

勸

學

篇

勸學篇下

外篇

益智第一

自強生於力力生於智智生於學孔子曰雖愚必明雖柔必強末有不明而能強者也人力不能敵虎豹然而能禽之者智也人力不能禦大水墮高山然而能阻之開之者智也豈西人智而華人愚哉歐洲之爲國也多羣虎相伺各思吞噬非勢鈞力敵不能自存故教養富強之政步天測地格物利民之技能日出新法互相仿效爭勝爭長且其壤地相接自輪船鐵路暢通以後來往尤數見聞尤廣故百年以來煥然大變三十年內進

勸學篇

外篇

一

漸西村舍

境尤速如家處通衢不問而多知學有畏友不勞而多益中華春秋戰國三國之際人才最多累朝混一以後倏然獨處於東方所與鄰者類皆陬澨蠻夷沙漠蕃部其治術學術無有勝於中國者惟是循其舊法隨時修飭守其舊學不踰範圍已足以治安而無患迨去古益遠舊弊日滋而舊法舊學之精意漸失今日五洲大通於是相形而見絀矣假使西國強盛開通適當我

聖祖

高宗之朝其時

朝廷恢豁大度不欺遠人遠識雄略不圖迂論而人才

衆多物力殷阜。吾知必已遣使通問。遠遊就學。不惟采其法師其長。且可引爲外懼。藉以倣我中國之泄沓戢我中國之盈侈。則庶政百能。未必不篤而上之。乃通商用兵。待至道光之季。其時西國國勢愈強。中國人才愈陋。雖被鉅創。罕有倣悟。又有髮匪之亂。益不暇及。林文忠嘗譯四洲志。萬國史略矣。然任事而不終。曾文正嘗遣學生出洋矣。然造端而不壽。文文忠創同文館。遣駐使編西學各書矣。然孤立而無助。迂謬之論。苟簡之謀。充塞於朝野。不惟不信不學。且詬病焉。一倣於臺灣番。再倣於琉球。三倣於伊犁。四倣於朝鮮。五倣於越南。

緬甸六倣於日本禍機急矣而士大夫之茫昧如故驕
玩如故天自牖之人自塞之謂之何哉夫政刑兵食國
勢邦交士之智也種宜土化農具糞料農之智也機器
之用物化之學工之智也訪新地創新貨察人國之好
惡較各國之息耗商之智也船械營壘測繪工程兵之
智也此教養富強之實政也非所謂奇技淫巧也華人
於此數者皆主其故常不肯殫心力以求之若循此不
改西智益智中愚益愚不待有吞噬之憂卽相忍相持
通商如故而失利損權得粗遺精將冥冥之中舉中國
之民已盡爲西人之所役矣役之不已吸之賡之不已

則其究必歸於吞噬而後快是故智以救亡學以益智士以導農工商兵士不智農工商兵不得而智也政治之學不講工藝之學不得而行也大抵國之智者勢雖弱敵不能滅其國民之智者國雖危人不能殘其種度印屬於英浩罕哈薩克屬於俄阿非利加分屬於英法德皆以愚而亡美國先屬於英以智而自立古巴屬於西班牙以不盡求智之法如何一曰去妄二曰去苟固陋愚而復振

馬士芥而已矣

愚民辨

三年以來外強中弱之形大著海濱人士稍稍閱萬

國公報讀滬局譯書接西國教士漸有悟華民之智
不若西人者則歸咎於中國歷代帝王之愚其民此
大謬矣老子曰有道者非以明民將以愚之此李斯
韓非之學暴秦之政也於歷代何與焉漢求遺書尊
六經設博士舉賢良求茂才異等絕國使才非愚民
也唐設科目多至五十餘宋廣立學校并設武學明
洪武三年開科經義以外兼考書算騎射律日知錄
引明太錄祖實非愚民也自隋以詞章取士沿襲至今此不過
爲薦舉公私無憑詞章考校有據耳謂立法未善則
可謂之愚民則誣至我朝

列聖殷殷以覺世牖民爲念刊布數理精蘊厯象考
成儀象考成教天算西學也遣使測經緯度繪天下
地圖教地輿西學也刊布授時通考教農學也纂七
經義疏刊布十三經二十四史九通開四庫館修書
分藏大江南北縱人入讀教經史百家之學也同治
軍務收平以後內外開同文方言館教譯也設製造
局教械也設船政衙門教船也屢遣學生出洋赴美
英法德學公法鑛學水師陸師礮臺鐵路也總署編
刊公法格致化學諸書滬局譯刊西書七十餘種教
各種西學也且同文館三年有優保出洋隨員三年

有優保學堂學生有保獎遊歷有厚資 朝廷欲破
民之愚望士之智皇皇如恐不及無如陋儒俗吏動
以新學爲詬病相戒不學故譯書不廣學亦不精出
洋者大半志不在學故成材亦不多是不學者負
朝廷耳且卽以舊制三場之法言之雖不能兼西學
固足以通中學咎在主司偏重士人剽竊非盡法之
弊也果能經義策問事事博通其於經濟大端百家
學術必能貫徹任以政事必能有爲且必能通達事
變決不至於愚矣譬如子弟不肖櫛有書而不讀家
有師而不親過庭入塾惟務欺飾及至頽廢貧困乃

怨懟其父母豈不悖哉大率近日風氣其贊羨西學者自視中國朝政民風無一是處殆不足比於人數自視其高曾祖父亦無不可鄙賤者甚且歸咎於數千年以前歷代帝王無一善政歷代將相師儒無一人才不知二千年以上西國有何學西國有何政也

遊學第二

出洋一年勝於讀西書五年此趙營平百聞不如一見之說也入外國學堂一年勝於中國學堂三年此孟子置之莊嶽之說也遊學之益幼童不如通人庶僚不如親貴嘗見古之遊歷者矣晉文公在外十九年徧歷諸侯歸國而霸趙武靈王微服遊秦歸國而強春秋戰國最尙遊學賢如曾子左邱明才如吳起樂羊子皆以遊學聞其餘策士雜家不能悉舉後世英主名臣如漢光武學於長安昭烈周旋於鄭康成陳元方明孫承宗未達之先周歷邊塞袁崇煥爲京官之日潛到遼東此往

勸學篇

外篇

六

事明效也。請論今事。日本小國耳。何興之暴也。伊藤山縣。榎本。陸奧諸人。皆二十年前出洋之學生也。憤其國爲西洋所脅。率其徒百餘人。分詣德法英諸國。或學政治工商。或學水陸兵法。學成而歸。用爲將相。政事一變。雄視東方。不特此也。俄之前主大彼得。憤彼國之不強。親到英吉利荷蘭兩國船廠。爲工役十餘年。盡得其水師輪機駕駛之法。并學其各廠製造。歸國之後。諸事丕變。今日遂爲四海第一大國。不特此也。暹羅久爲法國涎伺。於光緒二十年。與法有衅。行將吞併矣。暹王感憤。國內毅然變法。一切更始。遣其世子遊英國。學水師去。

年暹王遊歐洲駕火船出紅海來迎者卽其學成之世子也暹王亦自通西文西學各國敬禮有加暹羅遂以不亡上爲俄中爲日本下爲暹羅中國獨不能比其中者乎至遊學之國西洋不如東洋一路近省費可多遣一去華近易考察一東文近於中文易通曉一西書甚繁凡西學不切要者東人已刪節而酌改之中東情勢風俗相近易仿行事半功倍無過於此若自欲求精求備再赴西洋有何不可或謂昔嘗遣幼童赴美學習矣何以無效曰失之幼也又嘗遣學生赴英法德學水陸師各藝矣何以人才不多曰失之使臣監督不措意又

無出身明文也。又嘗派京員遊歷矣。何以材不材相兼。曰。失之不選也。雖然。以予所知。此中固亦有足備時用者矣。若因噎廢食之談。豚蹠篝車之望。此乃禍人家國之邪說。勿聽可也。嘗考孟子所論聖賢帝王將相。歷險難。成功業。其要歸不過曰。動心忍性。增益其所不能而已。曰。生於憂患而已。夫受侮而不恥。蹙國而不懼。是不動也。冥然罔覺。悍然不顧。以效法人爲恥。是不忍也。習常蹈故。一唱百和。憚於改作。官無一知。士無一長。工無一技。外不遠遊。內不立學。是不增益所不能也。無心無性。無能是將死於憂患矣。何生之足云。

設學第三

今年特科之

詔下士氣勃然濯磨興起然而六科之目可以當之無愧上副

聖心者蓋不多觀也去年有

旨令各省籌辦學堂爲日未久經費未集興辦者無多夫學堂未設養之無素而求之於倉卒猶不樹林木而望隆棟不作陂池而望巨魚也遊學外洋之舉所費既鉅則人不能甚多且必學有初基理已明識已定者始遣出洋則見功速而無弊是非天下廣設學堂不可各

省各道各府各州縣皆宜有學。京師省會爲大學堂。道府爲中學堂。州縣爲小學堂。中小學以備升入大學堂之選。府縣有人文盛、物力充者，府能設大學，縣能設中學，尤善。小學堂習四書、通中國地理、中國史事之大略。算數、繪圖、格致之粗淺者。中學堂各事較小學堂加深，而益以習五經、習通鑑、習政治之學。習外國語言文字。大學堂又加深加博焉。或曰：天下之學堂以萬數，國家安得如此之財力以給之？曰：先以書院改爲之學堂，所習皆在

詔書科目之內，是書院卽學堂也。安用駢枝爲？或曰：府

縣書院經費甚薄屋宇甚狹小縣尤陋甚者無之豈足以養師生購書器曰一縣可以善堂之地賽會演戲之款改爲之一族可以祠堂之費改爲之然數亦有限奈何曰可以佛道寺觀改爲之今天下寺觀何止數萬都會百餘區大縣數十小縣十餘皆有田產其物業皆由布施而來若改作學堂則屋宇田產悉具此亦權宜而簡易之策也方今西教日熾二氏日微其勢不能久存佛教已際末法中半之運道家亦有其鬼不神之憂若得儒風振起中華乂安則二氏固亦蒙其保護矣大率每一縣之寺觀取什之七以改學堂留什之三以處僧

道其改爲學堂之田產學堂用其七僧道仍食其三計其田產所值奏明

朝廷旌獎僧道不願獎者移獎其親族以官職如此則萬學可一朝而起也以此爲基然後勸紳富捐貲以增廣之昔北魏太武太平眞君七年唐高祖武德九年武宗會昌五年皆嘗廢天下僧寺矣然前代意在稅其丁廢其法或爲抑釋以伸老私也今爲本縣育才又有旌獎公也若各省薦紳先生以興起其鄉學堂爲急者當體察本縣寺觀情形聯名上請於朝

詔旨宜無不允也其學堂之法約有五要一曰新舊兼

學四書五經中國史事政書地圖爲舊學西政西藝西
史爲新學舊學爲體新學爲用不使偏廢一曰政藝兼
學學校地理度支賦稅武備律例勸工通商西政也算
繪鑛醫聲光化電西藝也西政之刑獄立法最善西藝
之醫最於兵事有益習武備
者必宜講求才識遠大而年長者宜西政心思精敏而年少
者宜西藝小學堂先藝而後政大中學堂先政而後藝
西藝必專門非十年不成西政可兼通數事三年可得
要領大抵救時之計謀國之方政尤急於藝然講西政
者亦宜略考西藝之功用始知西政之用意一曰宜教
少年學算須心力銳者學圖須目力好者學格致化學

製造須質性穎敏者學方言須口齒清便者學體操須
氣體精壯者中年以往之士才性精力已減功課往往
不能中程且成見已深難於虛受不惟見功遲緩且恐
終不深求是事倍而功半也一曰不課時文新學既可
以應科目是與時文無異矣況既習經書又兼史事地
理政治算學亦必於時文有益諸生自可於家習之何
勞學堂講授以分其才思奪其日力哉朱子曰上之人
曾不思量時文一件學子自是著急何用更要你教語類
卷一百九諒哉言乎一曰不令爭利外國大小學堂皆須納
金於堂以爲火食束修之費從無給以膏火者中國書

院積習誤以爲救濟寒士之地往往專爲膏火獎賞而
來本意旣差動輒計較錙銖忿爭攻訐頽廢無志紊亂
學規剽襲冒名大雅掃地矣今縱不能遽從西法亦宜
酌改舊規堂備火食不令納費亦不更給膏火用北宋
國學積分之法每月核其功課分數多者酌予獎賞數
年之後人知其益即可令納費充用則學益廣才益多
矣一曰師不苟求初設之年斷無千萬明師近年西學
諸書滬上刊行甚多分門別類政藝要領大段已詳高
明之士研求三月可以教小學堂矣兩年之後省會學
堂之秀出者可以教中學堂矣大學堂初設之年所造

亦淺每一省訪求數人亦尙可得三年之後新書大出
師範愈多大學堂亦豈患無師哉若書院粹不能多設
則有志之士當自立學會互相切磋文人舊俗凡舉業
楷書放生惜字賦詩飲酒圍棋葉戲動輒有會何獨於
關繫身世安危之學而緩之古人牧豕都養尙可聽講
通經豈必橫舍千間載書兼兩而後爲學哉始則二三
漸至什伯精誠所感必有應之於千里之外者昔原伯
魯以不悅學而亡越句踐以十年教訓而興國家之興
亡亦存乎士而已矣

學制第四

外洋各國學校之制有專門之學有公共之學專門之學極深研幾發古人所未發能今人所不能畢生莫殫子孫莫究此無限制者也公共之學所讀有定書所習有定事所知有定理日課有定程學成有定期或三年或五年入學者不中程不止惰者不得獨少既中程而卽止勤者不必加多資性敏者同爲一班資性鈍者同爲一班有間斷遲誤者附其後班生徒有同功師長有同教此有限制者也無事無圖無堂無算師無不講之書徒無不解之義師以己習之書爲教則師不勞徒以能解之

事爲學則徒不苦問其入何學堂而知其所習何門也
問其在學堂幾年而知其所造何等也文武將吏四民
百藝其學無不皆同小學堂之書較淺事較少如天文
地質繪圖算學格致方言體操之類具體而微中學堂
書較深事較多如小學堂地圖則極略僅具疆域山水
有鐵路電綫鑛山大勢又進則有府縣詳圖山水又進則
教堂餘書仿此方言則兼各國算學則講代數對數
於是化學醫術政治以次而及餘事仿此大學堂又有
加焉小學中學大學又各分爲兩三等期滿以後考其
等第給予執照國家欲用人才則取之於學堂驗其學
堂之憑據則知其任何官職而授之是以官無不習之

事士無無用之學其學堂所讀之書則由師儒纂之學部定之頒於國中數年之後或應增減訂正則隨時修改之其學堂之費率皆出地方紳富之捐集而國家略發官款以補助之入學堂者但求成才不求膏火每人月須納金若干以爲飲食束修之費貧家少納富家多納其官紳所籌學堂之費專爲建堂延師購書制器之用不爲學生膏獎亦有義學以教極貧子弟學生出來學者既已出費則必欲有所得而後歸學成之後仕宦工商各有生計自無凍餒此以教爲養之法也是以一國之內常有小學數萬區中學數千大學百數由費不

仰給於官亦不盡仰給於紳故也其善有三出貲來學則不愆志不在利則無爭官不多費則學廣蘇子瞻沮新法學校之說曰必將發民力以治宮室歛民財以養遊士如西法所爲可無多費之虞矣王介甫悔新法學校之誤曰本欲變學究爲秀才不謂變秀才爲學究如西法所爲可無變爲學究之患矣凡東西洋各國立學之法用人之法小異而大同吾將以爲學式

廣譯第五

十年以來各省學堂嘗延西人爲教習矣然有二弊師
生言語不通恃繙譯爲樞紐譯者學多淺陋或僅習其
語而不能通其學傳達失真豪釐千里其不解者則以
意刪減之改易之此一弊也即使譯者善矣而洋教習
所授每日不過兩三時所教不過一兩事西人積習往
往故作遲緩不盡其技以久其期故有一加減法而教
一年者矣即使師不憚勞而一西人之學能有幾何一
西師之費已爲鉅款以故學堂雖建迄少成材朱子所
謂無得於心而所知有限者也此二弊也前一弊學不

能精後一弊學不能多至機器製造局廠用西人爲工
師華匠不通洋文僅憑一二繙譯者其弊亦同嘗考三
代卽講譯學周書有舌人周禮有象胥誦訓揚雄錄別
國方言朱輔譯西南夷樂歌于謹兼通數國言語隋志
有國語雜文鮮卑號令婆羅門書扶南胡書外國書近
人若邵陽魏源於道光之季譯外國各書各新聞報爲
海國圖志是爲中國知西政之始南海馮煥光於同治
之季官上海道時創設方言館譯西書數十種是爲中
國知西學之始跡其先幾遠瞻洵皆所謂豪傑之士也
若能明習中學而兼通西文則有洋教習者師生對語

不惟無誤且易啟發無洋教習者以書爲師隨性所近
博學無方況中外照會條約合同華洋文義不盡符合
動爲所欺貽害無底吾見西人善華語華文者甚多而
華人通西語西文者甚少是以雖面談久處而不能得
其情其於交涉之際失機誤事者多矣大率商賈市井
英文之用多公牘條約法文之用多至各種西學書之
要者日本皆已譯之我取徑於東洋力省效速則東文
之用多惟是繙譯之學有深淺其僅能市井應酬語略
識帳目字者不入等能解淺顯公牘書信能識名物者
爲下等能譯專門學問之書

如所習天文鑛學則非所能譯天文鑛學書

習者不能譯也。爲中等能譯各門學問之書及重要公牘律法深意者爲上等。下等三年中等五年上等十年。我旣不能待十年以後譯材眾多而後用之。且譯學雖深而其志趣才識固未可知。又未列於仕宦。是仍無與於救時之急務也。是惟多譯西國有用之書以教不習西文之人。凡在位之達官腹省之寒士深於中學之耆儒略通華文之工商無論老壯皆得取而讀之。采而行之矣。譯書之法有三。一各省多設譯書局。一出使大臣訪其國之要書而選譯之。一上海有力書賈好事文人廣譯西書出售銷流必廣。主人得其名天下得其用矣。

此可爲貧士治生之計而隱有開物成務之功其利益
與石印場屋書等其功德比刻善書則過之惟字須略
大若石印書之密行細字則年老事繁之人不能多讀
卽不能多銷也今日急欲開發新知者首在居官任事
之人大率皆在中年以上且事煩暇少豈能挑燈細讀
譯洋報者亦然王仲任之言曰知古不知今謂之陸沈
知今不知古謂之聾聵吾請易之曰知外不知中謂之失
心知中不知外謂之聾聵夫不通西語不識西文不譯西
書人勝我而不信人謀我而不聞人規我而不納人吞我
而不知人殘我而不見非聾聵而何哉學西文者效遲而
用博爲少年未仕者計也譯西書者功近而效速爲中年
已仕者計也若學東洋文譯東洋書則速而又速者也是
故從洋師不如通

觀學篇

卷之八

六

洋文譯西書不如譯東書

閱報第六

李翰稱通典之善曰不出戶知天下罕更事知世變未

從政達民情

元文民作人
乃避唐諱

斯言也殆爲今日中西各報

言之也吾更益以二語曰寡交游得切磋外國報館林

立一國多至萬餘家有官報有民報官報宣國是民報

達民情凡國政之得失各國之交涉工藝商務之盛衰

軍械戰船之多少學術之新理新法皆具焉是以一國

之內如一家五洲之人如面語中國自林文忠公督廣

時始求得外國新聞紙而讀之遂知洋情以後更無有

繼之者上海報館自同治中有之特所載多市井猥屑

之事於洋報采摭甚略亦無要語上海道月有譯出西
國近事呈於總署及南北洋大臣然皆兩月以前之事
觸時忌者輒削之不書故有與無等乙未以後志士文
人創開報館廣譯洋報參以博議始於滬上流行於各
省內政外事學術皆有焉雖論說純駁不一要可以擴
見聞長志氣滌懷安之耽毒破捫籥之瞽論於是一孔
之士山澤之農始知有神州筐篋之吏煙霧之儒始知
有時局不可謂非有志四方之男子學問之一助也方
今外侮日亟事變日多軍國大計執政慎密不敢宣言
然而各國洋報早已播諸五洲不惟中國之政事也并

東西洋各國之愛惡攻取深謀詭計一一宣之簡牘互相攻發互相駁辨無從深匿俾我得以兼聽而豫防之此亦天下之至便也然而吾謂報之益於人國者博聞次也知病上也昔齊桓公不自知其有疾而死秦以不聞其過而亡大抵一國之利害安危本國之人蔽於習俗必不能盡知之卽知之亦不敢盡言之惟出之鄰國又出之至強之國故昌言而無忌我國

君臣上下果能覽之而動心恍之而改作非中國之福哉近人閱洋報者見其詆訾中國不留餘地比之醉人比之朽物議分裂議爭先類無不拂然怒者吾謂此何

足怒邪。勸攻吾闕者。諸葛之所求。諱疾滅身者。周子之所痛。古云。士有諍友。今雖云國有諍鄰。不亦可乎。

變法第七

變法者朝廷之事也何爲而與士民言曰不然法之變與不變操於國家之權而實成於士民之心志議論試觀曾文正爲侍郎時嘗上疏言翰林考小楷詩賦之弊

矣

文集卷一

及成功作相以後若力持此議當可成就近今

三十年館閣之人材然而無聞焉何也大亂旣平恐爲時賢所詬病也文文忠嘗開同文館刊公法格致各書矣以次推行宜可得無數使絕國識時務之才然而曲謹自好者相戒不入同文館不考總署章京京朝官講新學者闐然無聞何也劫於迂陋羣儒之謬說也夫以

勲臣元老名德重權尙不免爲習非勝是之談所撓而不覩其效是亦可痛可惜者矣又如左文襄在閩創設船政在甘創設機器織呢羽局沈文肅成船政設學堂與北洋合議設招商局丁文誠在山東四川皆設製造洋槍槍彈局此皆當世所謂廉正守道之名臣也然所經營者皆是此等事其時皆在同治中年光緒初年國家閒暇之時惜時論多加吹求繼者又復無識或廢閣或減削無能恢張之者其效遂以不廣夫不可變者倫紀也非法制也聖道也非器械也心術也非工藝也請徵之經窮則變變通盡利變通趣時損益之道與時偕

行易義也。器非求舊，惟新。尙書義也。學在四夷。春秋傳

義也。五帝不沿樂，三王不襲禮。禮時爲大，禮義也。溫故

知新。劉楚楨論語正義引漢書成帝紀詔曰：儒林之官，宜皆明於古今。溫故知新，通達國體。百官表以通

古今備溫故知新之義。孔冲遠禮記敘博物通人知今溫故知新爲三人必有我師，擇善而從。論語義也。時措

知古知今。三人必有我師，擇善而從。論語義也。時措

之宜，中庸義也。不恥不若人，何若人有？孟子義也。請徵

之史，封建變郡縣，辟舉變科目，府兵變召募，車戰變步

騎，租庸調變兩稅，歸餘變活閭，象籥變隸楷，竹帛變雕

版，籩豆變陶器，粟布變銀錢，何一是三代之舊乎？歷朝

變法最著者四事：趙武靈王變法習騎射，趙邊以安，北

魏孝文帝變法尙文明魏國以治此變而得者也若武靈之

不終以變幸魏之不承以商鞅變法廢孝弟仁義秦先

強而後促王安石變法專務剝民宋因以致亂此變而

失者也商王之失在殘酷剝民非不可變也法非其法

也西法以省刑養民兩事爲先務請徵之

本朝關外用騎射討三藩用南懷仁大礮乾隆中葉科

場表判改五策歲貢以外增優貢拔貢嘉慶以後綠營

之外創募勇咸豐軍興以後關稅之外抽釐金同治以

後長江設水師新疆吉林改郡縣變者多矣卽如輪船

電綫創設之始嘗議繁興此時若欲廢之有不攘臂而

爭者乎今之排斥變法者大率三等一爲泥古之迂儒泥古之弊易知也一爲苟安之俗吏蓋以變法必勞思必集費必擇人必任事其於昏惰偷安徇情取巧之私計皆有不便故藉書生泥古之談以文其猾吏苟安之智此其隱情也至問以中法之學術治理則皆廢弛欺飾而一無所爲所謂守舊豈足信哉又一爲苛求之談士夫近年仿行西法而無效者亦誠有之然其故有四一人顧其私故止爲身謀而無進境製造各局出洋各員是也此人之病非法之病也一愛惜經費故左支右絀而不能精船政是也此時之病非法之病也一朝無

定論故旋作旋輟而無成效學生出洋京員遊歷是也此浮言之病非法之病也一有器無人未學工師而購機未學艦將而購艦海軍各製造局是也此先後失序之病非法之病也乃局外游談不推原於國是之不定用人之不精責任之不專經費之不充講求之不力而吹求責效較之見彈求鴟炙見卵求時夜殆有甚焉學堂甫造而責其成材鑛山未開而責其獲利事無定衡人無定志事急則無事不舉事緩則無事不廢一埋一擗豈有成功哉雖然吾嘗以儒者之論折衷之矣呂伯恭曰鹵莽滅裂之學或作或輟不能變不美之質此變

法而無誠之藥也。曾子固曰：孔孟二子亦將因所遇之時所遭之變而爲當世之法，使不失乎先王之意而已。法者所以適變也，不必盡同道者所以立本也，不可不一。此變法而悖道之藥也。由呂之說則變而有功，由曾之說則變而無弊。夫所謂道本者，三綱四維是也。若并此棄之，法未行而大亂作矣。若守此不失，雖孔孟復生，豈有議變法之非者哉？

變科舉第八

朱子嘗稱述當時論者之言曰朝廷若要恢復須罷三十年科舉以爲極好痛哉斯言也中國仕宦出於科舉雖有他途其得美官者膺重權者必於科舉乎取之自明至今行之已五百餘年文勝而實衰法久而弊起主司取便以藏拙舉子因陋以傲幸遂有三場實止一場之弊錢曉徵語所解者高頭講章之理所讀者坊選程墨之文於本經之義先儒之說概乎未有所知近今數十年文體日益佻薄非惟不通古今不切經濟并所謂時文之法度文筆而俱亡之今時局日新而應科舉者拘膺

益甚傲然曰吾所習者孔孟之精理堯舜之治法也遇講時務經濟者尤鄙夷排擊之以自護其短故人才益乏無能爲國家扶危禦侮者於是

詔設學堂以造明習時務之人才又開特科以蒐羅之夫學堂雖立無進身之階人不樂爲也其來者必白屋鈍士資稟凡下不能爲時文者也其世族俊才皆仍志於科舉而已卽有特科之設然廿年一舉爲時過遠豈能坐待則仍爲八比詩賦小楷而已救時之才何由可得且夫齊衣敗紫晉曳直履趙文王好劍而士死於相擊越句踐好勇而士死於焚舟從上所好也兩漢經學

實祿利之途。毆之使鄉會試。仍取決於時文。京朝官仍
累長於小楷。名位取舍。惟在於斯。則雖日討國人而申
倣之。告以禍至無日。戒以識時務。求通才。救危局。而朝
野之汶闇如故。空疏亦如故矣。故救時必自變法。始變
法必自變科舉。始或曰。若變科舉。廢時文。則人不讀五
經四書可乎。於是有獻學校貢舉私議者。曰。變科舉者
非廢四書文也。不專重時文。不講詩賦小楷之謂也。竊
謂今日科舉之制。宜存其大體。而斟酌修改之。昔歐陽
文忠知諫院時。惡當時舉人鄙惡剽盜。全不曉事之弊。
嘗疏請改爲三場分試。隨場而去之法。每場皆有去留。

頭場策合格者試二場二場論合格者試三場其大要
曰鄙惡乖誕以漸先去少而易考不至勞昏全不曉事
之人無由而進其說頗切於今日之情事歐公之欲以
策論救詩賦猶今之欲以中西經濟救時文也今宜略
師其意擬將今日三場先後之序互易之而又層遞取
之大率如府縣考覆試之法第一場試以中國史事
本朝政治論五道此爲中學經濟假如一省中額八十
名者頭場取八百名額四十名者頭場取四百名大率
十倍中額卽先發榜一次不取者罷歸取者始准試第
二場二場試以時務策五道專問五洲各國之政專門

之藝政如各國地理官制學校財賦兵制商務等類藝
如格致製造聲光化電等類此爲西學經濟其雖解西
法而支離狂怪顯悖聖教者斥不取中額八十名者二
場取二百四十名額四十名者取一百二十名大率三
倍中額再發榜一次不取者罷歸取者始准試第三場
三場試四書文兩篇五經文一篇四書題禁纖巧者合
校三場均優者始中式發榜如額如是則取入二場者
必其博涉古今明習內政者也然恐其明於治內而闇
於治外於是更以西政西藝考之其取入三場者必其
通達時務研求新學者也然又恐其學雖博才雖通而

理解未純趣向未正於是更以四書文五經文考之其
三場可觀而中式者必其宗法聖賢見理純正者也大
抵首場先取博學二場於博學中求通才三場於通才
中求純正先博後約先粗後精既無迂闇庸陋之才亦
無偏駁狂妄之弊三場各有取義較之偏重首場所
多矣且分場發榜下第者先歸二三場卷數愈少校閱
亦易寒士無久羈之苦謄錄無卷多謬誤之弊主司無
竭蹶草率之虞一舉三善人才必多而著重尤在末場
猶之府縣試皆憑末覆以定去取不愈見四書五經之
尊哉惟科舉必以生員爲基其學政歲科兩考生童均

可以例推之歲科考例先試經古一場卽專以史論時
務策兩門發題生員歲考正場原係一四書文一經文
生員科考正場原係一四書文一策亦照歲考例改爲
經文以免荒經之弊童試一切照生員惟將正場第二
篇四書文改爲經文而已蓋生童考試舊章正與今日
所擬科舉之法相類二十年來經古場久已列算學一
門是尤不勞而理者也難者曰主司不能盡通新學將
如之何曰應試難試官易近年來上海編纂中外政學
藝學之書不下二十種闡中例准調書據書考校何難
之有且房官中通曉時務者尙多總裁主考惟司覆閱

何難之有至外省主考學政年力多強

詔旨旣下以三年之功講求時務自足以衡文量才而有餘鄉會試之外惟殿試臨軒發策典禮至重自不可廢然可卽據以爲授職之等差朝考似爲可省及通籍以後無論翰苑部曹一應職官皆以講求政治爲主凡考試文藝小楷之事斷斷必宜停免惟當考其職業以爲進退則已仕之人才不致以雕蟲小技困之於老死矣難者曰本朝名臣出於科舉者多矣安見時文之無益不知登進限於一途則英雄不能不歸於一轂此乃人才之亦能爲時文非時文之足以得人才也且諸名

臣之學識閱歷率皆自通籍以後始能大進然則中年以前神智精力銷磨於應舉者不少矣假使主文者不專以八比詩賦爲去取所得柱石之臣干城之士不更多乎竊謂議者之說意救時而事易行實本

明旨特科歲舉講求經濟之意而推闡之因存其說於此并將朱子論科舉之弊及歐公論三場以漸去留之疏節錄於左可知七八百年以上之賢人君子憂國勢人才之不振疾官人選舉之無方其謀慮固已如此庶今世士大夫得有所儆悟焉

東塾讀書記引朱子論科舉

南宋時科舉之弊朱子論之者甚多其言亦極痛切
今略舉數條於此衡州石鼓書院記云今日學校科
舉之教其害有不可勝言者不可以爲適然而莫之
救也學校貢舉私議云名爲治經而實爲經學之賊
號爲作文而實爲文字之妖主司命題又多爲新奇
以求出於舉子之所不意於所當斷而反連之於所
當連而反斷之爲經學賊中之賊文字妖中之妖又
云怪妄無稽適足以敗壞學者之心志是以人材日
衰風俗日薄語類云今人文字全無骨氣自是時節
所尙如此只是人不知學全無本柄被人引動尤而

效之。而今作件物事。一個做起。一個學起。有不崇

朝而徧天下者。本來合當理會底事。全不理會。直是

可惜。

卷一百一十九

時文之弊已極。日趨於弱。日趨於巧小。

將士人這些志氣都消削得盡。莫說以前只是宣和

末年三舍法纔罷。學舍中無限好人材。如胡邦衡之

類。是甚麼樣有氣魄。做出那文字。是甚豪壯。當時亦

自然有人。及紹興渡江之初。亦自有人才。那時士人

所做文字極粗。更無委曲柔弱之態。所以亦養得氣

宇。只看如今。是多少衰氣。

卷一百一十九

最可憂者。不是說秀

才做文字不好。這事大關世變。

同上

問今日科舉之弊。

使有可爲之時此法何如曰更須兼他科目取人上同
問今日之學校自麻沙時文冊子之外其他未嘗過
而問焉曰怪他不得上之所以教者不過如此然上
之人曾不思量時文一件學子自是著急何用更要
你教你設學校卻好教他理會本分事業上同此亦朱
子欲救當時風氣之弊使朱子見今日科舉時文不
知更以爲何如耳

節錄歐陽公論更改貢舉事件劄子

慶曆四年

伏以貢舉之法用之已久則理當變更必先知改弊
之因方可收變法之利知先詩賦爲舉子之弊則當

重策論

歐公時之不專重詩賦意與今日不專重時文同

知通考紛多爲有

司之弊則當隨場而去而後可使學者不能濫進考者不至疲勞請寬其日限而先試以策而考之擇其文辭鄙惡者文意顛倒重雜者不識題者不知故實略而不對所問者誤引事跡者雖能成文而理識乖誕者雜犯舊格不考式者凡此七等之人先去之計二千人可去五六百以其留者次試以論又如前法而考之又可去其二三百其留而試詩賦者不過千人矣於千人而選五百少而易考不至勞昏考而精當則盡善矣縱使考之不精亦當不至太濫蓋其節

鈔剽盜之人皆以先經策論去之矣。比及詩賦皆是已經策論粗有學問理識不至乖誕之人縱使詩賦不工亦可以中選矣。如此可使童年新學全不曉事之人無由而進。

農工商學第九

石田千里謂之無地愚民百萬謂之無民

韓詩外傳語不講

農工商之學則中國地雖廣民雖眾終無解於土滿人滿之譏矣勸農之要如何曰講化學田穀之外林木果實一切種植畜牧養魚皆農屬也生齒繁百物貴僅樹五穀利薄不足以爲養故昔之農患惰今之農患拙惰則人有遺力所遺者一二拙則地有遺利所遺者七八欲盡地利必自講化學始周禮草人掌土化之法實爲農家古義養土膏辨穀種儲肥料留水澤引陽光無一不需化學又須精造農具凡取水殺蟲耕耘磨礱或用

風力或用水力各有新法利器可以省力而倍收則又兼機器之學西人謂一畝之地種植最優之利可養三人若中國一畝所產能養一人亦可謂至富矣然化學非農夫所能解機器非農家所能辦宜設農務學堂外縣士人各考其鄉之物產以告於學堂堂中爲之考求新法新器而各縣鄉紳有望者富室多田者試辦以爲之倡行而有效民自從之

上海農學報多采西書甚有新理新法講農政者宜閱之

昔者英忌茶之仰給於華也印度錫蘭講求種茶無微不至自印茶盛行茶市日衰銷路僅恃俄商大率俄銷十之八英美銷其一二綠茶中含有一質烈而兼香西

人名曰膽念印茶惟膽念較華茶略少故俄尙食華茶
若再數年印茶日精恐華茶無人過問矣此茶戶種茶
不培摘芽不早茶商不用機器烘焙無法之弊也光緒二十
年湖北湖南兩省合力以官款買茶三百二十箱附俄
公司船運赴俄境自銷之西路水運銷阿曼薩託出使
許大臣交俄行帶售東路陸運銷恰克圖託俄商余威
羅福代售除茶價運費關稅外西路贏餘得息一分東
路贏餘得息五分若使我自有公絲之爲利比茶尤多
司在彼其利必更饒餘可知也
十年以前西洋各國用華絲者十之六三年以內日本
絲銷十之六意國絲十之三華絲僅十之一且本貴則
價難減價昂則銷愈滯此由養蠶者不察病蠶售繭者
多撓壞繭繭耗既多成本自貴之弊也外國種棉分燥

土溼土兩種長莖宜溼地短莖宜燥地種植疏闊故結

實肥大

種子三粒爲一窠長至四五寸畱壯者一株其餘拔去每莖相距橫三尺三寸縱一尺三寸

洋布洋紗爲洋貨入口第一大宗歲計價四千餘萬兩自湖北設織布局以來每年漢口一口進口洋布已較往年少來十四萬匹特是洋紗最精有四十號者而華棉絨短紗粗以機器紡之僅能紡至十六號紗止以故不能與洋紗洋布敵購洋棉子種之多不蕃茂此由農夫見小種棉過密又不分燥溼之弊也麻爲物賤南北各省皆產然僅供緝繩作袋之用川粵江西僅能織夏布耳西人運之出洋攬以棉則織成苧布攬以絲則織

所分者坐賈之餘如刮毛龜背雖得不多雖有積貨如
阜日贏千金猶爲西商役也至勸商之要更有三端一
曰譯商律商非公司不巨公司非有商律不多華商集
股設有欺騙有司罕爲究追故集股難西國商律精密
官民共守故集股易一曰自治近年茶市雖敝然仍是
芽嫩無煙者價高而速售徽溼攙雜者樣盤抵換者價
虧而難銷若不求自治之方而欲設總行以爲合羣持
價之計西商固必不聽羣販亦必不從一曰遊歷各省
宜設商會上海設一總商會會中自舉數人出洋遊歷
察其市情貨式隨時電告以爲製造販運之衡此較設

道一曰工師專以講明機器學理化學爲事悟新理變新式非讀書士人不能爲所謂智者創物也一曰匠首習其器守其法心能解目能明指能運所謂巧者述之也中國局廠良匠多有通曉機器者然不明化學算學故物料不美不曉其源機器不合不通其變且自祕其技不肯傳授多人徒以把持居奇鼓眾生事爲得計此王制所謂執技事上不與士齒者耳今欲教工師或遣人赴洋廠學習或設工藝學堂均以士人學之名曰工學生將來學成後名曰工學人員使之轉教匠首更宜設勸工場凡衝要口岸集本省之工作各物陳列於中

以待四方估客之來觀第其高下察其好惡巧者多銷拙者見絀此亦勸百工之要術也商學之要如何曰通工藝夫精會計權子母此商之末非商之本也外國工商兩業相因而成工有成器然後商有販運是工爲體商爲用也此易知者也其精於商術者則商先謀之工後作之先察知何器利用何貨易銷何物宜變新式何法可輕成本何國喜用何物何術可與他國爭勝然後命工師思新法創新器以供商之取求是商爲主工爲使也此罕知者也二者相益如環無端中國之商惟聽其自然而已所冀者億中之利如博塞求贏但憑時運

阜日贏千金猶爲西商役也至勸商之要更有三端一曰譯商律商非公司不巨公司非有商律不多華商集股設有欺騙有司罕爲究追故集股難西國商律精密官民共守故集股易一曰自治近年茶市雖敝然仍是芽嫩無煙者價高而速售黴溼攪雜者樣盤抵換者價虧而難銷若不求自治之方而欲設總行以爲合羣持價之計西商固必不聽羣販亦必不從一曰遊歷各省宜設商會上海設一總商會會中自舉數人出洋遊歷察其市情貨式隨時電告以爲製造販運之衡此較設

外洋公司爲易夫學問之要無過閱歷各國口岸卽商務之大學堂也大抵農工商三事互相表裏互相鉤貫農瘠則病工工鈍則病商工商聾瞽則病農三者交病不可爲國矣至如駝羊之毛鷄鴨之羽皆棄材也馬牛之皮革皆賤貨也西商捆載而去製造而來價三倍矣水泥西人名塞門德火塼以中國觀音土火柴火油洋氈洋紙洋蠟洋糖洋鍼洋釘質賤用多而易造者也事仰給外人而歲耗無算矣然而以上諸事非士紳講之官吏勸之不可苟卿盛稱儒效而謂儒不能知農工商之所知此末世科目章句之儒耳烏覩所謂效哉

兵學第十

或曰兵必須學論語曰以不教民戰是謂棄之諸葛忠武曰八陣旣成自今行師庶不覆敗矣是兵有法有教也或曰兵不在學霍去病曰顧方略何如耳不至學古兵法岳武穆曰運用之妙存乎一心是兵無法無教也此皆聖賢名將之說也何道之從曰吾將以四說通之蓋兵學之精至今日西國而極有械不利利械不習與無手同工作不嫻橋道不便輜重不備與無足同地理不熟測量不準偵探不明與無耳目同聚千萬無手無足無耳目之人烏得爲兵是必先教之以能戰之具範

勸學篇

外篇

畫

之以不敗之法。旣成爲兵矣，而後可以施方略。言運用
至於方略運用，豈必西法？亦豈必古法哉？漢藝文志：兵
家分權謀、形勢、陰陽、技巧四類。西人兵學，惟陰陽不用。
餘皆兼之。槍礮、雷電、鐵路、礮臺、濠壘、橋道，技巧也。地圖
測算、形勢也。至攻守謀略，中西所同。因其械精藝多，條
理繁細，故權謀一端亦較中法爲密。陸軍之別有五：曰
步隊、馬隊、礮隊、工隊、輜重隊。工輜兩隊皆兼每一軍皆
兼有之。如四體具，而後爲人工隊。主營壘、橋道之事，輜
重隊主械藥、衣糧之事。西法以步隊、礮隊爲最重，馬隊
止爲包抄及偵探之用。工輜二隊，古人所略。緣火器猛

烈或大隊相持或偵探扼守必須掘地營開濠塹頃刻
立就若遇溪河泥沙必須應時可渡故立工隊今日用
快槍快礮所需彈藥過多一裝五子十子連珠而發者
相連一分鐘可放以及備戰各物至為繁重故立輜重
隊數十出者為快礮分爲數起層遞轉運故進不誤用退不全失淮南子
言將以五官為股肱手足一曰尉之官治軍者也一曰
侯之官偵探也一曰司空之官空工古今字即工程隊
之官也一曰與之官即輜重隊之官也其一關其說與
之官曰收藏於後遷舍不離無淫輜輿之官也
因無此隊之為累矣臨戰之善有三一未戰先繪圖欲
敵國有戰事先於一兩一馬隊充偵探偵探必以馬隊
年前詳繪敵境地圖一馬隊充偵探分途四出更番
歸一前敵有軍醫樂隊以作戰士之氣今姑從緩血
報一前敵有軍醫樂隊以作戰士之氣今姑從緩血

兵之善有四。一餉厚。一將不發餉。別有官主之。一兵不自爨。官爲供備。一陣亡者卹其家。終身教武備。學生之法有三。曰學堂。曰操場。曰野操。學堂講軍械理法地理。測繪戰守機宜。古來戰事操場習體操隊伍火器野操。習分合攻守偵探。或於山阜。或於溪谷。或於平地。作兩軍對敵狀。惟將所指揮。無定式。不僅在校場排演舊陣也。將領教偏裨之法有二。曰兵棋。曰戰圖。兵棋者。取地圖詳繪山水道路林木村落。以木棋書馬步各隊。將校環坐。各抒所見。商榷攻守進退之法。戰圖者。取西國古來大戰事諸圖。推究其勝敗之故。其教之程期有三。教兵止在操場。遲者一年。可用速者半年。可用教。

弁卽有學堂若綠營把總外委額外勇營哨官哨長皆爲弁步隊輜重隊弁十

四月馬隊弁十六月礮隊工隊弁十八月均兼隨營操

演其十四歲以前列入小學堂不在此數教將官者學堂五年隨營操演

二年若綠營千總以上至副將勇營管帶以下爲弁界限甚嚴教大將者

學堂五年隨營二年再入大學堂二年若提鎮及大統領凡爲

將官者雖爲官仍不廢學以時受教於本管之將領必

至大將乃不受學初入學堂者年無過二十歲總之略

於教兵詳於教將此其要旨也自將及弁無人不讀書

自弁及兵無人不識字無人不明算無人不習體操無

人不解繪圖此其通例也水師之別有二曰管輪曰駕

勸學篇

外篇

三

駛管輪主輪機測量駕駛主槍礮攻戰先教之於學堂
大率五年復教之於練船游歷各國海口習風濤測海
道觀戰事大率三年其事較陸軍爲尤精將領之外又
最要之官兩項一曰參謀官主謀畫調度考地理審敵
情國君之參謀若宋之樞密明之本兵將帥之參謀若
今之營務處而較尊一曰會計官主一軍械物衣糧車
馬何物用汽車一車裝若干何物用馬一馬馱若干何
物用馬車一車裝若干皆豫算於平時若今之糧臺兩
項官皆出於學堂參謀尤重今日固有營務處糧臺但
無豫爲此兵之等差有三在營者爲常備兵教之三年
學者耳卽遣之歸名爲豫備兵不給餉每年調集一操酌予獎
賞又三年則罷爲後備兵有大戰事常備不足則以豫
備兵充之大率每年常備之退爲豫備兵者約三之一

補新兵亦三之一。新舊層遞蛻換，行之二十年，則舉國之人無不習戰者。用餉愈省，得兵愈多，兵技常熟，兵氣常新。其法創始於德，歐洲效之，東洋踵之。歐洲大戰動輒用兵二三十萬，故兵須多。然此法所以能行者，外國重武，其民以充兵爲榮，爲國家效力計，不爲一身餬口計。華兵以入伍爲生計，故疲老多而裁難汰。且工商多，閒民少，其兵皆有技能，軍籍既脫，仍有執業，故可行也。中國若仿爲之，則惟有於三年學成之兵發給憑照，退爲豫備兵，遣歸本籍，酌給半餉，以供本縣緝捕之用。改業遠出者，不給餉。三年以後，亦照西法退爲後備。有事募集，亦可得半。至其教將士之本務，有二

曰知忠愛曰厲廉恥西洋將官教武備學生之言曰汝

成專爲報效國家若臨戰無勇乃國家之恥一身之恥

若無此心雖練成與西兵一律之才能亦無用也云云

西人武備書所言意與此略同東洋將領人給官書一

卷佩之於身有來湖北者取視其本所載皆中國古來

忠義文字如出師所以將士皆能知忠愛厲廉恥者其

表正氣歌之類

道有一曰尚武功其國君服提督之服鄰國之君相贈

以武將之銜臨戰之饑寒有備戰歿之家屬有養兵之

死亡君親弔之兵之創傷后親療之故將之尊貴過於

文臣兵之自愛過於齊民強國之由其在此矣今日朝

野皆知練兵爲第一大事然不教之於學堂技藝不能

精也不學之於外洋藝雖精習不化也在上無發憤求

戰之心以倡導之兵雖可用將必不力也或曰使古之
孫吳韓岳戚近今之江塔羅李多與西人戰能勝否乎
曰能亦學西法否乎曰必學夫師出以律聖之明訓也
知己知彼軍之善經也後起者勝古今之通義也兵事
爲儒學之至精胡文忠閱歷有得之格言也孫子火攻
篇即西法
先導謀攻篇其次伐交九地篇不知諸侯之謀者不能
豫交爭天下之交養天下之權皆西國兵爭要義吳子
地輕馬馬輕車車輕人輕戰戰與西法行軍修路合一
人學戰教成十萬人萬人學戰教成三軍與西法學堂重
在教將領合畜騎之知忠愛廉恥則必學其不學者必
對與西法養馬合

其不知忠愛廉恥者也使諸名將生今之世必早已習
其器曉其法參以中國之情勢即非仿行亦必暗合即

出新意亦同宗旨而又鼓以忠義之氣運以奇正之略
奚爲而不可勝哉若近日武臣怠惰粗疏一切廢弛而
藉口於漢家自有制度亦多見其無效忠死國之誠而
已矣方今兵制教法東洋西洋大略皆同蓋由推求精
善故各國有則效而無改易之者語曰不習爲吏視已
成事況不習兵而又不視成事豈不殆哉

鑛學第十一

鑛學者兼地學化學工程學三者而有之其利甚博而其事甚難夫以渾渾土石略見苗引而欲測其鑛質之優劣鑛層之厚薄鑛脈之橫斜施工之難易是何異見垣一方人之神術矣西國鑛師之精者聲價極重不肯來華其來者中下駟而已方今興利之法誠無急於此者然華商既無數百萬之鉅貲鑛之易開者一萬又無數十年之鑛學但憑西師一言豈能驟集巨股且無論何鑛非深不佳水源不止一孔石隔不止一層資費耗盡亦必中作而輟若略備微資姑用土法遇水遇石卽已

廢然而返是鑛利終不可與也是惟有先講實學緩求速效之一法今山東之鑛已爲他人所籠山西之鑛亦爲西商所覬若東三省之金湖南四川雲南以及川滇邊界夷地番地之五金煤炭最爲豐饒他省亦尙不少有鑛之省宜由紳商公議立一鑛學會籌集資斧公舉數人出洋赴鑛學堂學習數年學成回華再議開采察鑛之質性而後購機水有開通運道之法陸有接通大小鐵路之法而後采鑛能不用西師固善卽仍用西師我亦可辨其是非而不爲所欺如是則得尺得寸不等於象罔求珠矣竊謂今日萬事根本惟在於煤故煤鑛

較他鑛尤急而開煤尤非鑿井深入不爲功凡近地面之煤其灰質必較多其磺氣必較重其煤質必不甚堅結土法之病斜穿而不能深入遇水而不能急抽或積水淹或架木圯或煤氣閉或地火發是四者皆足以壞井即使淺嘗可得佳煤而所得無多其井已廢數月必棄一井一年必易一山人力已竭而佳煤未動雖鑿徧九州之山而斷不能得一可用之煤鑛鐵煉鋼必須焦炭非佳煤不能煉焦炭非西法所煉亦不能精此又煤鑛之相因遞及者嘗考英

國之富以煤鑛興故西人謂煤鑛之利國利民實在五金以上五金若乏可以他物代之煤則孰能代之煤源

一斷機器立停百舉俱廢雖有富强之策安所措手哉
大抵西法諸事皆以先學藝後舉事爲要義學將而後
練兵學水師而後購艦學工師而後製造學鑛師而後
開鑛其始似遲其後轉速其費亦必省或曰必待學成
而後開鑛如時迫效遠何無已則有一變通之策焉就
本省內擇取一鑛募西人之曾辦鑛廠確有閱歷者與
議包辦一切用人購器聽其主持不掣其肘約定出鑛
後優給餘利限滿而不得鑛有罰卽於局內設鑛學堂
鑛成獲利以後我之學生及委員工匠皆已學成此藉
鑛山爲鑛學堂之法也

但須嚴定限制止開此處若全省包辦則其害甚大不可行

記曰地不愛其寶人不愛其情若人無湛深之思專壹之志而欲乞靈富媪安坐指揮以徼大利蓋不可得之數矣

更有一策與西人合本開采本息按股勻分但西本止可十之三四不得過半尤爲簡易無弊較之全爲西人所據及閤佳鑛而不能開者不遠勝乎此策在前三年則必梗於時議此時或可行矣

鐵路第十二

有一事而可以開士農工商兵五學之門者乎曰有鐵路是已士之利在廣見聞農之利在暢地產工之利在用機器商之利在速行程省運費兵之利在速徵調具糧械三代以道路爲大政見於周禮月令左傳國語諸書西法富强尤根於此中國道路之政久已不講山行則犖确澤行則泥淖城市蕪雜鄉僻阻絕以故人憚於出鄉物艱於致遠士有鐵路則遊歷易往師友易來農有鐵路則土苴糞壤皆無棄物商有鐵路則急需者應期重滯者無阻工有鐵路則機器無不到鑛產無不出

煤炭無不敷兵有鐵路則養三十萬精兵可以縱橫戰
守於四海凡此五學總之以二善一曰省日力一日可
治十日之事官不曠民不勞時不失一曰開風氣凡從
前一切頹惰之習自然振起迂謬耳食之論自然消釋
泯絕而不作至於吏治不壅民隱不遏驛使不羈差徭
不擾災歉不憂皆相因而自善夫如是故天下如一室
九州如指臂七十萬方里之地皆其地也四百兆之人
皆其人也如人之一身氣脈暢通而後有運動耳目聰
明而後有知覺心知靈通而後有謀慮耳目者外國報
也心知者學堂也氣脈者鐵路也若鐵路不成五學之

開未有日也至鐵路所不到之處則先多修馬路及行
手車之小鐵路阜民敏政亦其次矣綜觀東西洋各國
自三十年來無不以鐵路爲急日增月多密如蛛網大
國有鐵路數十萬里小國有鐵路二三萬里

東西洋各國設有鐵路會考求鐵路利

病新法三年一舉

今中國幹路北起盧溝南達廣州

已歸總公司建造以後分造支路工尤省利尤厚其尤
便者凡借洋款皆須抵押獨修鐵路一事借款卽以此
路作抵無須他物商爲之則利在商國爲之則利在國
況方今東海之權我已與西洋諸國共之門戶阻塞如
鯁在喉若內無鐵路則五方隔絕坐受束縛人遊行於

海上我痿痺於室中中華豈尙有生機乎昔魏太武譏
劉宋爲無足之國以此較兩國勝負之數謂北朝多馬
南朝無馬也若今日時勢海無兵輪陸無鐵路則亦無
足之國而已及今圖之爲時已晚若再因循顧慮恐盡
爲他人代我而造之矣

會通第十三

易傳言通者數十。好學深思。心知其意。是謂通。難爲淺見。寡聞道。是謂不通。今日新學舊學。互相訾訾。若不通其意。則舊學惡新學。姑以爲不得已而用之。新學輕舊學。姑以爲粹不能盡廢而存之。終古柄鑿。所謂疑行無名。疑事無功而已矣。中庸天下至誠盡物之性。贊天地之化育。是西學格致之義也。大學格致與西人格致絕不相涉。譯西書者借其字耳。周禮土化之法。化治絲枲。飭化八材。是化學之義也。周禮一易再易三易。草人稻人所掌。是農學之義也。禮運貨惡弃地。中庸言山之廣大。終以寶藏興焉。是開鑛

之義也周禮有山虞林衡之官是西國專設樹林部之義也中庸來百工則財用足夫不以商足財而以工足財是講工藝暢土貨之義也論語工利其器書器非求舊維新是工作必取新式機器之義也論語百工居肆夫工何以不居其鄉而必居肆意與管子處工就官府同是勸工場之義也周禮訓方氏訓四方觀新物是博物院賽珍會之義也大學生之者眾食之者寡卽西人富國策生利之人宜多分利之人宜少之說也大學生財大道爲之者疾論語敏則有功然則工商之業百官之政軍旅之事必貴神速不貴遲鈍可知是工宜機器

行宜鐵路之義也周禮司市亡者使有微者使阜害者
使亡靡者使微是商學之義亦卽出口貨無稅進口貨
有稅及進口稅隨時輕重之義也論語教民七年可以
卽戎不教民戰是謂棄之是武備學堂之義也司馬法
雖遇壯
者不校勿敵敵若傷之醫藥歸之與
西人交戰時有醫家紅十字會同漢書藝文志謂九
流百家之學皆出於古之官守是命官用人皆取之專
門學堂之義也左傳仲尼見郊子而學焉是赴外國遊
學之義也內則十三年舞勺成童舞象學射御聘義勇
敢强有力所以行禮是體操之義也學記不歆其藝鄭從
注不能悅學是西人學堂兼有玩物適情諸器具之義

勸學篇

外篇

吳

也呂刑簡孚有眾維貌有稽

貌說文作
緇細也

王制疑獄汜與

眾其之是訟獄憑中證之義也周禮外朝詢眾庶書謀
及卿士謀及庶人從逆各有吉凶是上下議院互相維
持之義也論語眾好必察眾惡必察是國君可散議院
之義也王制史陳詩觀民風市納價觀民好左傳士傳
言庶人謗商旅市工獻藝是報館之義也凡此皆聖經
之奧義而可以通西法之要指其以名物文字之偶合
瑣瑣傳會者皆置不論若謂神氣風霆爲電學含然謂
萬物而化光爲光學之類聖經皆已發其理創其制則是謂聖經皆已習西人之
技具西人之器同西人之法則非昔孔子有言曰吾聞

之天子失官學在四夷猶信是此二語乃春秋以前相傳之古說列子述化人以穆王遠遊西域漸通也鄒衍談赤縣以居臨東海商舶所傳也故埃及之古刻類乎大篆南美洲之碑勒自華人然則中土之學術政教東漸西被蓋在三代之時不待疇人分散老子西行而已然矣以後西漢甘英之通西海東漢蔡愔秦景之使天竺摩騰輩之東來法顯輩之西去大秦有邛竹杖師子國有晉白團扇中西僧徒水陸商賈來往愈數聲教愈通先化佛國次被歐洲次第顯然不可誣也然而學術治理或推而愈精或變而失正均所不免且知慧旣開

以後心理同而後起勝自亦必有其合古法之處且必有軼過前人之處卽以中土才藝論之算數厯法諸事陶冶雕織諸工何一不今勝於古日食有定自晉謂聖人已推得之人所創可也謂中土今日之工藝不勝於唐虞三代不可也萬世之巧聖人不能盡洩萬世之變聖人不能豫知然則西政西學果其有益於中國無損於聖教者雖於古無徵爲之固亦不嫌沉揆之經典灼然可據者哉今惡西法者見六經古史之無明文不察其是非損益而概屏之如詆洋操爲非而不能用法練必勝之兵詆鐵艦爲費而不能民船爲海防之策是自塞也自

塞者令人固蔽傲慢自陷危亡略知西法者又概取經典所言而傳會之以爲此皆中學所已有如但誦借根方爲東來法而不習算學但矜火器爲元太祖征西域所遺而不講製造槍礮是自欺也自欺者令人空言爭勝不求實事溺於西法者甚或取中西之學而糅雜之以爲中西無別如謂春秋卽是公法孔教合於耶穌是自擾也自擾者令人眩惑狂易喪其所守綜此三蔽皆由不觀其通不通之害口說紛呶務言而不務行論未定而兵渡江矣然則如之何曰中學爲內學西學爲外學中學治身心西學應世事不必盡索之於經文而必

無悖於經義如其心聖人之心行聖人之行以孝弟忠
信爲德以尊主庇民爲政雖朝運汔機夕馳鐵路無害
爲聖人之徒也如其昏惰無志空言無用孤陋不通傲
狠不改坐使國家顛隳聖教滅絕則雖弟佗其冠紳禪
其辭手注疏而口性理天下萬世皆將怨之詈之曰此
堯舜孔孟之罪人而已矣

非弭兵第十四

兵之於國家猶氣之於人身也肝藏血而助氣故內經以肝爲將軍之官人未有無氣而能生者國未有無兵而能存者今世智計之士覩時勢之日棘慨戰守之無具於是創議入西國弭兵會以冀保東方太平之局此尤無聊而召侮者也向戊弭兵子罕責其以誣道蔽諸侯況今之環球諸強國誰能誣之誰能蔽之奧國之立弭兵會有年矣始則俄攻土耳其未幾而德攻阿洲未幾而英攻埃及未幾而英攻西藏未幾而法攻馬達加斯加未幾而西班牙攻古巴未幾而土耳其攻希臘未

聞奧會中有起而爲魯連子者也德遂以兵占我膠州
矣俄又以兵占我旅順矣廿年以來但聞此國增兵船
彼國籌新餉爭雄爭長而未有底止我果有兵弱國懼
我強國親我一動與歐則歐勝與亞則亞勝如是則耀
之可也弭之亦可也權在我也我無兵而望人之弭之
不重爲萬國笑乎誦孝經以散黃巾黃巾不聽舉騶虞
幡以解鬪鬪者不止苟欲弭兵莫如練兵海有戰艦五
十艘陸有精兵三十萬兵日雄船日多礮臺日固軍械
日富鐵路日通則各國相視而不肯先動有敗約者必
出於戰不恤孤注不求瓦全如是則東洋助順西洋居

開而東方太平之局成矣管子曰寢兵之說勝則險阻
不守全生之說勝則廉恥不立若弭兵之議一倡則朝
野上下人人皆坐待此會之成更不復有憂危圖治之
心枕戈待敵之事各省寥寥數軍裁者不復存者不練
器械朽敗臺壘空虛文酣武嬉吏貪民困忠諫不入賢
才不求言官結舌人才消沮諸國見我之昏愚如此無
志如此於是一舉而分裂之是適以速亡而已山行不
持兵而望虎之不啞人不亦徒勞矣乎又有篤信公法
之說者謂公法爲可恃其愚亦與此同夫權力相等則
有公法強弱不侔法於何有古來列國相持之世其說

曰力鈞角勇勇鈞角智未聞有法以束之也今日五洲各國之交際小國與大國交不同西國與中國交又不同卽如進口稅主人爲政中國不然也寓商受本國約束中國不然也各國通商只及海口不入內河中國不然也華洋商民相殺一重一輕交涉之案西人會審各國所無也不得與於萬國公會笑暇與我講公法哉知弭兵之爲笑柄悟公法之爲警言舍求諸已而何以哉

非攻教第十五

異教相攻自周秦之間已然儒墨相攻老儒相攻莊道

也而與他道家相攻荀儒也而與他儒家相攻唐則儒

釋相攻後魏北宋則老釋相攻儒之攻他教者辨黑白

他教之相攻者爭盛衰歐洲因爭新教舊教連兵相殺數十年乃教士各爭權勢藉以

為亂非爭是非也至今日而是非大明我孔孟相傳大中至正

之聖教炳然如日月之中天天理之純人倫之至即遠

方殊俗亦無有譏議之者然則此時為聖人之徒者恐

聖道之陵夷思欲扶翼而張大之要在修政不在爭教

此古今時勢之不同者也中外大通以來西教堂布滿

中國傳教既爲條約所准行而焚毀教堂又爲

明旨所申禁比因山東盜殺教士一案德國藉口遂踞膠州各國乘機要求而中國事變日亟有志之士但當砥厲學問激發忠義明我中國尊親之大義講我中國富强之要術國勢日强儒效日章則彼教不過如佛寺道觀聽其自然可也何能爲害如仍頽廢自甘於孔孟之學術政術不能實踐力行學識不足以濟世用才略不足以張國威而徒詬厲以求勝則何益矣豈惟無益學士倡之愚民和之莠民乘之會匪游兵藉端攘奪無故肇衅上貽

君父之憂下召憑陵之禍豈志士仁人所忍爲者哉不特此也海上見聞漸狎中西之町畦漸化若游歷內地愚夫小兒見西國衣冠者則呼譟以隨之擲石毆擊以逐之一鬪而起莫知其端并不問其爲教士非教士歐洲人美洲人也夫無故而詬擊則無禮西人非一或稅關所用或官局所募或游歷或傳教茫然不辨一概憤疾則不明

詔旨不奉則不法以數百人擊一二人則不武怯於公戰勇於私鬪則不知恥於是外國動謂中國無教化如此狂夫亦何以自解哉至於俗傳教堂每有荒誕殘忍

勸學篇

外篇

五

之事謂取人目睛以合藥物以造錐水以點鉛而成銀
此皆譌謬相沿決不可信光緒十七年宜昌教案先開
人皆無目者百口一辭及委員往會同府縣一驗視
則皆無影響止一人替其一目眼眶內癰其睛尚在
人及其父母均言因出痘所傷羣疑始釋又如光緒二
十二年江陰教堂之案乃係劣生向教堂索詐埋死孩
以圖栽誣城鄉周知其入當卽試思西教創立千餘年
服罪訊結此皆近事之可憑者
流行地球數十國其新教舊教爭權攻擊則多有之矣
從無以殘忍之事爲口實者若有此事則西國之人早
已盡爲教堂殘毀無完膚無遺種矣若謂不戕西人惟
殘華民則未通中華以前此千餘年中之藥物錐水銀
條安所取之且方今外洋各國所需之藥物錐水所來

之銀條一日之內卽已無算中國各省雖有教堂又安
得日斃數千萬之教民日挾數千萬之眸子以供其取
求耶語云流丸止於甌與流言止於智者薦紳先生縫
掖儒者皆有啟導愚蒙之責慎勿以不智爲海外之人
所竊笑也